

Kupasan dan Ulasan

Berjalan-jalan ke Tepi Laut Dahulu Baharu Berkahwin

Di dalam perjumpaannya dengan Radio Singapura, Ustaz Taha Suhaimi, Hakim Mahkamah Shar‘iyah, telah menganjurkan supaya perkahwinan dapat tersimpul rapat maka kedua-dua yang hendak bertunang itu hendaklah lebih dahulu berkenal-kenalan dan bolehlah berjalan-jalan ke tepi laut dengan ditemani oleh mahramnya. Di bawah ini ialah ulasan terhadap kepada anjurannya yang disusun oleh ‘Idrus.

Kata Tuan Taha Suhaimi

Radio Singapura dalam ruangan “Rancan¹ Radio” keluaran 4 Julai 1959 pukul 8.30 malam setelah memberi pandangan-pandangan tentang banyaknya bercerai lalu mengadakan pertanyaan kepada Hakim Mahkamah Shar‘iyah Singapura, Tuan Taha Suhaimi tentang apakah ikhtiar-ikhtiar yang patut dijalankan untuk mengurangkan perceraian di kalangan umat Islam itu. Hakim Mahkamah Shar‘iyah itu berkata:

“..... Nampaknya saya di sini ditanya apakah sebabnya orang-orang Melayu lebih banyak bercerai daripada bangsa-bangsa asing. Ialah orang-orang Islam di negeri ini sekurang-kurangnya. Saya suka²

“Saya rasa di sini yang dikehendaki orang-orang Melayu hendak terangkan apa sebabnya orang-orang asing atau yang bukan Islam di Singapura atau di Malaya kurang bercerai daripada orang-orang kita

Islam. **Jadi sebabnya ialah**, tetapi saya harap jangan lekas terperanjat, orang-orang asing ertinya orang yang bukan Islam mereka **memang jarang bercerai** kerana **sebelum mereka berkahwin** mereka boleh dikatakan semuanya **sudah berkenal-kenalan dahulu** terkadang-kadang berbulan-bulan dan bertahun-tahun mereka berkenal-kenalan. Dari itu sebelum kahwin sudah tahu betul-betul di antara sifat-sifat satu sama lain iaitu pihak lelaki dan pihak perempuan. Jadi kalau sudah tahu³ macam itu jadi mereka senang sahaja mau teruskan sampai berkahwin atau diputuskan begitu sahaja. Kalau kahwin,

kerana mereka sudah tahu yang mereka itu sudah sesuai

di antara satu sama lain jadi tentulah boleh kekal.

“Kita orang-orang Islam ada **di suruh berkenal-kenalan** dahulu sebelum berkahwin sebab ada hadis Nabi *sallā Allāhu 'alayhi wa sallam* sebagaimana tersebut di dalam Nayl al-Awtār:

*Wā 'anāl-Muğīrah ibnū Shu'bāhānahukhaqabainnā'atanfa qāla al-nabīyy
(S.A.W) unzur ilayhā fa 'innahu uhrā an yu'dama baynakumā rawāḥu al-khamsatu
illā abā Dawūd*

(Ertinya hadis ini datangnya daripada Mughirah ibn Shu‘bah iaitu ianya telah meminang seorang perempuan jadi Nabi (S.A.W) bersabda kepadanya, sabdanya: **Engkau lihatlah** kepada tunang engkau itu kerana dengan melihat dia itu lebih ada harapan yang perkahwinan engkau itu boleh kekal).

“Jadi di dalam hadis Nabi (S.A.W) itu menunjukkan kita disuruh menengok dahulu. Jadi di dalam **menengok** biasanya kadang-kadang **tidak memada**.

“Mengikut kata setengah-setengah kitab fiqh, **menengok** hendaklah pihak lelaki dan pihak perempuan duduk di tengah-tengah rumah misalnya dan mestilah ada seorang tua sama-sama kemudian di situ bercakaplah serta melihat satu sama lain atau sebagainya. Kalau sekali tidak puas hati misalnya belum rasa puas hati melihat atau **bercakap-cakap** itu boleh datang dua kali, tiga kali sampai rasa

¹ Kesilapan ejaan dalam teks asal. Sebetulnya ‘Rancangan’.

² Kesalahan cetakan asal. Baris ayat bercampur.

³ Kerosakan teks asal.

puas hati. Jikalau rasa sesuai dan bolehlah menjadi jodoh ertinya bolehlah berkahwin, kalau tidak boleh dimansuhkan sahaja, tak jadi kahwin. Itulah secara Islam.

“Tetapi rasa saya **kadang-kadang tidak memada juga** kalau bercakap duduk begitu sahaja kadang-kadang tak tahu cakapnya, boleh jadi kadang-kadang agaknya kakinya atau badannya tak boleh jadi kadang-kadang caranya bercakap tak betul kalau duduk sahaja begitu tak nampak kadang-kadang caranya bercakap dia dan cara-cara lain-lain lagilah. Jadi, pada fikiran saya sendiri, boleh juga kalau pemuda dan pemudi bercadang hendak berkahwin itu berjalan, **keluar makan angin ke tepi laut** tetapi jangan lekas terperanjat nanti kata saya suruh bebas keluar begitu sahaja – tidak! Kalau hendak pergi ke tepi laut misalnya hendaknya mesti ada orang tua bersama-sama – jangan bersendiri-sendiri ertinya walau di mana pun pergi mestilah ada orang tua bersama-sama di sana, **orang yang layak** yakni **yang boleh menjadi pemerhati** yang munasabah supaya jangan terlajak atau tergelincir, sebab kalau kita terlajak atau tergelincir itu berat hukumnya. Jadi saya rasa inilah satu daripada sebabnya perkahwinan orang-orang asing atau orang yang bukan Islam itu banyak yang lebih kekal daripada kita orang-orang Islam.” Sekian katanya dalam perkara ini.

Ringkasan pendapat Ustaz Taha Suhaimi

Pendapat Ustaz Taha Suhaimi, Hakim Mahkamah Syar‘iyah itu bolehlah kita ringkaskan seperti ini:

1. Sebab orang-orang yang bukan Islam di Singapura itu sangat kurang bercerai kerana
 - a) Mereka lebih dahulu telah berkenalan di antara satu sama lain berbulan bahkan bertahun-tahun.
 - b) Sebelum mereka berkahwin cukup mengetahui betul-betul sifat-sifat mereka keduanya.
 - t) Dengan berkenalan itulah baharulah ditentukan adakah mereka terus berkahwin atau tidak.
2. Dengan memandang kebaikan berkenal-kenalan itu dahulu maka beliau membawa atau mensesuaikan dengan hukum-hukum Islam seperti:
 - a) Orang-orang Islam adalah lebih dahulu **disuruh berkenalan** berdasarkan kepada hadis yang diriwayatkan daripada Mughīrah ibn Shu‘bah yang menjawab pertanyaan Mughīrah untuk melihat tunangnya dengan menyatakan bahawa Rasulullah **membenarkan melihat perempuan**. Menengok itu, katanya kadang-kadang tidak memada kerana itu:

1. Menurut kata setengah-setengah kitab fiqah – menengok itu (di antara lelaki perempuan itu) hendaklah dihadiri oleh walinya.
 - 2) Mereka boleh berbual-bual dan bercakap-cakap dan melihat-lihat di antara lelaki satu sama lain.
 - 3) Tidak puas dengan sekali maka melihat dan bercakap-cakap itu boleh dilakukan dua atau tiga kali sehingga puas hati.
 - 4) Sesudah ada persetujuan baharulah ditentukan adakah diteruskan atau dibatalkan.
 - 5) Di dalam perjumpaan itu hendaklah dihadiri oleh orang walinya dan diadakan di tengah-tengah rumah.
3. Setelah menerangkan tentang “kelulusan” agama Islam itu, beliau lalu menganjurkan
 - a) Dengan cara yang tersebut itu tidak memada kerana banyak yang mesti dilihat seperti keadaan kaki dan petuturnya.
 - b) Sebab itu hendaklah diluluskan kedua-duanya sama-sama berjalan, ke tepi laut umpamanya dengan diiringi oleh seorang tua kepercayaan sebagai **pemerhati** untuk mengawal mereka supaya jangan mengeluari batasan.
 4. Cara berkenalan seperti dalam perkara 3 itu ialah salah satu jalan yang baik untuk mengekalkan perkahwinan.
- #### **Kekesalan**
- Keterangan Ustaz Taha Suhaimi sebagai sifatnya Hakim Mahkamah Syar‘iyah itu sebenarnya banyak mempengaruhi kepada masyarakat sedang pendapatnya itu harus dipandang oleh orang ramai sebagai suatu ajaran yang berasas kepada hukum-hukum Islam sedang daripada apa yang kita perhatikan bahawa hukum-hukum Islam tidak pun demikian itu keadaannya.
- Sebenarnya adat seperti yang dilakukan oleh orang-orang Kristian **berkenalan dahulu sebelum kahwin** itu di bandar-bandar telah pun ditiru oleh orang-orang Islam sendiri – bukannya sekarang sahaja tetapi jauh semenjak dari sebelum perang tetapi yang besarnya semenjak tahun 1946 membawa kepada sekarang. Rasanya tidaklah keadaan itu molek ditambah dengan satu anjuran lain oleh Hakim Mahkamah Syar‘iyah Singapura itu kerana apa yang terjadi sebenarnya kahwin dengan berkenal-kenalan itu pun banyak yang bercerai sehingga ke hadapan Mahkamah Syar‘iyah itu sendiri – yang ertinya cara berkenal-kenalan itu sebenarnya tidak sekali-sekali boleh menjadi sebab yang utama bagi mengekalkan perkahwinan kerana banyak

pula yang kahwin yang tidak pernah memandang pun bakal isterinya, kekal, aman dan damai serta hidup rukun dan berbahagia.

Hal ini lebih-lebih dikesalkan lagi kerana anjuran daripada seorang Hakim Mahkamah Syar'iyyah yang dipandang berpengetahuan luas dalam hukum-hukum syarak Islam telah menganjurkan sesuatu anjuran yang bertentangan³bukannya sahaja dengan hukum agama tetapi juga dengan hukum adat istiadat orang-orang Islam di timur ini. Banyak perceraian – bukan itu sebabnya tetapi banyak sebab-sebab yang lain yang akan saya cuba terangkan pada akhir makalah ini nanti.

Buruk atau tidaknya atau apa akibat-akibatnya yang terjadi cara perkahwinan atau pertunangan orang-orang yang bukan Islam itu tidaklah saya hendak mengupasnya kerana ia tidak kena-mengena dengan kita. Kalau dikupas ia akan menyakiti mereka sahaja. Pembaca-pembaca sendiri silalah selidiki dan perhatikan buruk baiknya.

Berkenalan, hukum dari mana?

Kami telah menyelidiki hadis yang diriwayatkan oleh Mughīrah bin Shu'bah yang tersebut. Hadis itu tersiar di dalam Nayl al-Awṭār juz 6 muka 94 seperti lafadz yang tersebut di atas. Di dalam hadis itu diterangkan bahawa Rasulullah (S.A.W) hanya membenarkan melihat (memandang atau menengok) dan tidak sekali-kali ada menyebut kelulusan bercakap atau berkenalan. Banyak hadis-hadis mengenai kelulusan menengok tunang itu ada disebut di dalam kitab-kitab hadis. Kita tidak menurunkan semuanya di sini.

Di dalam kitab-kitab fiqah ada menyebut bahawa kelulusan menengok itu adalah hanya pada luasan mukanya dan tapak tangan serta belakang tangannya. Melihat muka diluluskan untuk mengetahui cantik buruknya, dan melihat tapak dan belakang tangan untuk mengetahui kesihatan perempuan itu. Menurut mazhab al-Imām al-Shāfi'ī tatkala hendak melihat itu tidak perlu kepada izin kerana kalau memberitahu lebih dahulu ertiannya memberi peluang wanita itu untuk bersolek terlebih dahulu sedang menurut mazhab al-Imām Abū Ḥanīfah tidak mengapa diberitahu lebih dahulunya.

Untuk melihat atau memandang itu pula keempat-empat mazhab (Mālik, Ḥanafī, Shāfi'ī dan Ḥanbalī) telah sekata:

1. Memandang itu tidak bermaksud dengan pandangan syahwat
2. Pernuda itu yakin bahawa wanita dan walinya sedia menerimanya
3. Ia telah berazam penuh untuk berkahwin.

Kalau tidak ada syarat-syarat yang tersebut maka wanita memandang lelaki, lelaki memandang wanita hukumnya haram. Haramnya itu adalah disandarkan kepada perintah Allah di dalam *al-Qur'an* Surah al-Nūr ayat 30 dan 31 yang ertiinya:

“Suruhlah Mukminin menundukkan sebahagian dari pandangan-pandangan mereka (memalingkan pandangan mata daripada melihat perempuan dan memelihara kemaluhan mereka. Yang demikian itu lebih bersih buat mereka. Sesungguhnya Allah amat mengetahui apa yang mereka kerjakan.

“Dan suruhlah Mukminat (perempuan-perempuan mukminin) menundukkan sebahagian daripada pandangan-pandangan mereka (jangan melihat laki-laki) dan memelihara kemaluhan mereka dan janganlah mereka nampakkan perhiasan mereka melainkan apa yang zahir *ilā āakhir*”

Ayat hijab ini disokong oleh beberapa hadis lagi tentang aurat perempuan dan lelaki, tentang tegahan melihat lelaki yang bukan mahramnya sekalipun lelaki buta dan perempuan tidak, tentang terpandang sekali dan tegahan mengulang pandangan itu.

Bersandar kepada ini semua kami tidak mendapati ada di dalam kitab-kitab fiqah, seperti yang dikatakan beliau, ada meluluskan duduk bersama-sama bercakap sekalipun dengan ada mahramnya bersama sekali, dua kali dan seterusnya sehingga puas duduk bersama-sama di tengah rumah umpamanya apa lagi berjalan-jalan ke tepi laut kerana yang demikian lebih membawa bahaya lagi. Kami tidak akan mengadakan teguran.

Kita berpendapat bahawa syarak tidak sekali-sekali meluluskan anjuran seperti itu. Demikian juga adat orang-orang Timur pun tidak meluluskan, yang demikian telah terang banyak membawa mudarat daripada manfaat bahkan cara itu tidak menjamin untuk membawa ini sekiranya anjuran atau galakan “berkenal-kenalan” itu terbitnya daripada orang-orang awam tetapi daripada seorang kenamaan Hakim Mahkamah Syar'iyyah adalah sangat-sangat mendukacitakan.

Banyak lagi keterangan-keterangan daripada hadis-hadis yang boleh dibawa kebahagiaan hidup. Sebab-sebabnya dapat kita lihat di dalam perkahwinan yang bukan Islam. Saya tidak mau mengulas perkara ini kerana saya tidak mau menyakiti orang lain agamanya.

Untuk menguatkan hujah-hujah di dalam menegakkan perdirian ini tetapi kita rasa memadai dengan apa yang tersebut itu.

Hukum Berkahwin

Sebelum kita memberi pendapat tentang sebab-sebab perceraian dan memberi syor bagaimana caranya mengurangkan perceraian itu ada moleknya di sini kita lebih dahulu mengetahui tentang hukum-hukum

³ Kesalahan ejaan teks asal. Ditambah perkataan ‘be-

mengenai nikah atau berkahwin itu.

Hukum nikah itu oleh ulama dibahagi kepada: 1 Wajib,

2 Haram, 3 Sunat, 4 Makruh, dan 5 *Mubāh*.

1. Wajib: Wajib nikah atas tiap-tiap seorang yang ada mempunyai keinginan dan takut dirinya jatuh ke dalam perzinaan sekiranya ia tidak kahwin dan tidak dapat mematahkan nafsunya dengan berpuasa, berdasar kepada hadis yang diriwayatkan oleh Ibnu Mas‘ūd yang maksudnya (Wahai sekalian pemuda siapa mempunyai kemampuan untuk kahwin hendaklah ia kahwin. Kerana perkahwinan itu mengurangkan pandangan dan menyelamatkan kemahuan daripada perzinaan, dan barang siapa tidak mampu hendaklah ia berpuasa sesungguhnya puasa itu akan dapat mematahkan syahwatnya.”

2. Haram: Nikah itu boleh menjadi haram sekiranya seseorang itu aman atas dirinya dari perzinaan dan tidak berkemampuan untuk memberi nafkah kepada isterinya daripada pencariannya yang halal atau pun tidak berkemampuan dalam memberi nafkah batin.

3. Sunat: Sunat nikah itu jika ia mempunyai kemahuan di dalam pernikahan dan tidak khuatir atas dirinya melakukan perzinaan dan mempunyai kemampuan atas belanja kahwin dan belanja rumah tangga.

4. Makruh: Nikah itu menjadi makruh bagi seseorang yang mempunyai kemahuan di dalam pernikahan akan tetapi ia khuatir tidak dapat menunaikan sebahagian daripada apa yang diwajibkan agama atasnya.

5. Mubah: Nikah itu jadi mubah bagi seseorang yang tidak mempunyai kemahuan dan tidak mengharapkan keturunan sedang ia mampu mengadakan perbelanjaan dan tidak menghalangnya di dalam melakukan ibadat.

Hukum ini mengenai sama ada bagi lelaki atau perempuan dan di sini dapat dilihat bagaimana kedudukannya yang sebenar terutamanya tanggungjawab terhadap kepada sara hidup (zahir) dan perkara nafkah yang mengenai batin.

Daripada ini juga bahawa tiap-tiap perkahwinan itu adalah bergantung kepada kemampuan seseorang suami di dalam menunaikan kewajipannya sebagai ketua rumah tangga di dalam perkara-perkara menyempurnakan tanggungjawabnya di dalam nafkah zahir dan batin.

Kewajipan Suami Isteri

Di dalam menentukan kewajipan-kewajipan sebagai seorang suami isteri maka asas-asasnya bolehlah diambil daripada beberapa

maksudnya hadis dan *al-Qur’ān* yang tersebut di bawah ini.

1. Perempuan itu ialah amanah Allah kepada lelaki dan kerana itu hendaklah tiap-tiap seorang suami itu berbuat baik kepadanya.

2. Seorang sahabat Nabi telah bertanya kepada Rasulullah (S.A.W) dan Rasulullah (S.A.W) menjawab: Engkau beri ia makan jika engkau makan, dan engkau beri ia pakaian jika berpakaian, dan jangan memukul mukanya (menempeleng – P), dan jangan mencela keburukannya dan jangan memboikotnya kecuali di dalam rumah.

3. Tuhan berfirman (*Surah al-Nisā’* ayat 34) yang maksudnya: Dan mereka (isteri-isteri) yang kamu khuatirkan nusuznya hendaklah kamu nasihati dan boikotlah mereka itu di tempat-tempat tidur *ilā ākhīr*”.

4. Dalam khutbah haji perpisahan (*hujjah al-widā*) pada 9 **Dhū al-Hijjah** tahun hijrah kesepuluh Nabī berpesan – Sesungguhnya isteri-isteri mempunyai hak-hak dan kewajipan atas kamu dan kamu mempunyai hak-hak kewajipan di atas isteri-isteri kamu. Hak kamu atas isteri-isteri kamu – janganlah mereka membikarkan seseorang memijak tempat tidurmu dan janganlah mereka mengizinkan seseorang yang kamu benci memasuki rumahmu, sesungguhnya hak mereka (isteri) terhadap kamu hendaklah kamu berlaku baik kepada mereka di dalam pakaian dan makanan mereka.” (Diriwayatkan oleh Ibnu Mājah).

Ada banyak lagi anjuran-anjuran tentang cara-cara hidup berumahtangga – umpamanya caranya kalau tidak dapat lagi persesuaian hidup maka hendaklah perpisahan itu dibuat dengan cara yang baik – wanita yang telah dijadikan isteri itu dipulangkan kepada keluarganya, di dalam masa idah tiga bulan diberi perbelanjaan dan tempat yang cukup. Anak-anak yang dipelihara olehnya hendaklah diberi nafkah dengan secukupnya dan jerih payahnya memelihara anak itu pun hendaklah dibayar. Syarak Islam adalah memberi secukup-cukupnya panduan dan galakan membuat kebaikan – dan yang besarnya di dalam usaha ini ialah melapangkan dada suka maaf memaafkan di antara satu dengan lain.

Sebab Banyak Bercerai

Sebab-sebab yang utama menjadikan perceraian pada masa ini ialah

- 1) Krisis akhlak atau jatuhnya budi pekerti umat Islam sekarang

2) Kurang memerhatikan ajaran agama dan beramal dengannya.

Kalau kita perhatikan riwayat-riwayat yang sedih di dalam perceraian yang berlaku sehingga dibawa ke dalam mahkamah itu, tidak lain dan tidak bukan berasas kepada kedua-dua perkara yang tersebut di atas dengan tidak berkecuali mengenai orang-orang yang berkahwin berkenalan dahulu atau pun tidak mengenal dahulu.

Lazim di dalam permulaan berkahwin – hidup mereka manis dan suka cita tetapi apabila kahwin itu berjalan lama maka timbulah berbagai-bagai perkara yang membawa kepada kerumitan hidup. Kadang-kadang kerumitan itu suami tidak dapat mengikut kemahuan-kemahuan isterinya – dan terkadang-kadang pula timbulah cakap sindiran-sindiran, terutamanya apabila isteri mudah mendengar fitnah-fitnah atau acuman-acuman daripada jirannya. Hari ini sedikit sinaran bara apinya maka esok ditambah lagi akhirnya lama-lama menimbulkan bara yang lama-kelamaan membakar dan berkesudahan dengan meletus membawa perselisihan mulut di antara kedua-dua pihak.

Perselisihan seperti ini akhirnya membawa dua haluan di dalam rumah tangga – suami lain haluan, isteri lain haluan. Suami pergi mencari nafkah isteri keluar rumah menengok wayang, berbual ke rumah jiran – suami balik disambut dengan muka masam – kadang-kadang suami tidak tahu pula sebab musababnya – suami tidak ditegur, makannya tidak diendahkan. Kerana itu, kalau suami masih sabar – ia membongkar mencari makan ke dapur – dan kalau tidak sabar keluar rumah mencari makan dan seterusnya mencari kesenangan di luar rumah. Belanja yang sepatutnya untuk rumah tidak lagi cukup dibawa ke rumah.

Isteri pula kalau panas mencari kesenangan dirinya, melihat wayang gambar, berjalan dan seterusnya – akhirnya anak di rumah terbiar, susunan rumah tangga tidak teratur dan seterusnya.

Inilah selalunya punca perceraian – masing-masing tidak menyempurnakan tanggungjawab mereka.

Ikhtiar untuk Mengurangkannya

Mana-mana yang telah berumahtangga adalah sangat sulit untuk memberi pelajaran dan didikan kepada mereka. Sebagaimana disebut di atas bahawa Islam banyak memberi pertunjuk-pertunjuk atas kebaikan-kebaikan itu. Pertunjuk-pertunjuk itu tidak akan dapat diketahui melainkan kepada pemuda pemudi yang bakal menjadi calon berumahtangga

itu diberi didikan yang mengenai kerohanian dan kejasmanian.

Kerohanian hendaklah diajarkan tentang cara-cara hidup menahan *sentiment*, sabar dan membersihkan jiwa mereka cara mengorbankan perasaan untuk keselamatan rumah tangga.

Kejasmanian: Hendaklah diajar kepada mereka cara mengatur rumah tangga, cara menyelenggarakan suami dan cara mensesuaikan diri dengan keadaan dan hasil mahsul suami, cara menjaga diri, cara menjaga dan mendidik anak dan cara masak-memasak.

Bagi orang-orang lain-lain agama terutamanya di negeri-negeri yang maju pemuda dan pemudi terutamanya adalah mendapat didikan khas di dalam perkara ini bahkan ada sekolah-sekolah yang mengajarkannya. Untuk kita molek diadakan kursus-kursus dahulu dan adalah hendaknya ulama yang keluar memberi pengorbanan masanya memberi kursus-kursus itu dengan lebih dahulu mensesuaikan keadaannya dengan kehendak pemuda pemudi itu. Jangan pula umpamanya diminta mensyarahkan persiapan untuk perkahwinan berumahtangga diminta dikursuskan tetapi dibawa kepada membicarakan hukum kahwin lebih daripada satu.

Perkara ini sebenarnya sangat mustahak dikursuskan dan dipelajari. Ingatlah bahawa kalau seorang isteri dapat mengorbankan perasaannya dan sabar lazimnya rumah tangga akan aman dan berbahagia sekalipun mereka berkahwin tidak pernah melihat muka masing-masing.

Menyiarkan Berita-berita Rumah Tangga

Di dalam ucapan radio itu juga Tuan Taha Suhaimi mengatakan bahawa dengan kerana tersiarinya berita-berita rumah tangga yang dibicarakan itu ada baiknya kerana banyak orang tidak mau ke mahkamah takut namanya tersiar di dalam akhbar.

Perkara ini sebenarnya tidak menjadi alasan untuk mengurangkan perbicaraan di mahkamah itu tetapi menyiarkan dan membenarkan perkara itu tersiar adalah sangat menyalahi pandangan Islam kerana menyiarkan keibaikan seseorang sangat ditegah. Kerana itu kita berharap seupaya Majlis Islam Penasihat Kerajaan bertindak menuntut supaya kerajaan memperundang-undangkan perbicaraan di Mahkamah Syar‘iyah itu tertutup buat disiarkan sebab bertentangan dengan ajaran Islam.